

BOSNA I HERCEGOVINA
Konkurencijsko vijeće



БОСНА И ХЕРЦЕГОВИНА
Конкуренијски савјет

Rješenje
po Prijavi namjere koncentracije privrednog subjekta Atlas Copco International B.V.,
Holandija i privrednog subjekta AC Oprema d.o.o., Sarajevo

Sarajevo
Decembar 2007. godine



Broj:01-05-26-030-9-II/07
Sarajevo, 14. decembra 2007. godine

Na osnovu člana 25. stav (1) tačka e) člana 42. stav (1) tačka d) člana 43. stav (2), a u vezi sa čl. 12., 14., 16. i 18. Zakona o konkurenciji ("Službeni glasnik BiH", br. 48/05 i 76/07), rješavajući po Prijavi namjere koncentracije privrednog subjekta Atlas Copco International B.V. Merwedeweg 7, 3336LG Zwijndrecht, Holandija i privrednog subjekta AC Oprema d.o.o., Safeta Zajke 266, 71000 Sarajevo, zaprimljene pod brojem: 01-05-26-030-II/07 dana 21.09.2007. godine, Konkurencijsko vijeće na 56. (pedesetšestoj) sjednici održanoj dana 14. decembra 2007. godine, je donijelo

R J E Š E N J E

1. Ocjenjuje se dopuštenom koncentracija na tržištu prodaje opreme za idustriju rudarstva u Bosni i Hercegovini, koja će nastati sticanjem kontrole kupovinom većine udjela u osnovnom kapitalu privrednog subjekta AC Oprema d.o.o., Safeta Zajke 266, 71000 Sarajevo, od strane privrednog subjekta Atlas Copco International B.V., Merwedeweg 7, 3336LG Zwijndrecht, Holandija.
2. Ovo Rješenje je konačno i upisuje se u Registar koncentracija.
3. Ovo Rješenje bit će objavljeno u "Službenom glasniku BiH", službenim glasilima entiteta i Brčko Distrikta Bosne i Hercegovine.

O b r a z l o ž e n j e

Privredni subjekt Atlas Copco International B.V. Merwedeweg 7, 3336LG Zwijndrecht, Holandija (u daljem tekstu: Atlas ili podnosilac Prijave), putem ovlaštenog punomoćnika advokata Marić Branka, Mehmeda Spahe 24, 71000 Sarajevo, je podnio Konkurencijskom vijeću Prijavu namjere koncentracije (u daljem tekstu: Prijava), kojom podnosilac Prijave želi kupovinom udjela u osnovnom kapitalu steći 100,0% vlasništvo nad privrednim subjektom AC Oprema d.o.o., Safeta Zajke 266, 71000 Sarajevo (u daljem tekstu: AC Oprema).

Prijava namjere koncentracije podnesena je Konkurencijskom vijeću dana 21.09.2007. godine pod brojem: 01-05-26-030-II/07, u skladu sa članom 16. stav (1) Zakona o konkurenciji (u daljem tekstu: Zakon).

Uvidom u dostavljenu Prijavu Konkurencijsko vijeće je utvrdilo da ista nije kompletna u smislu člana 30. Zakona, te je u skladu sa članom 31. istoga Zakona, zatražilo dopunu Prijave dopisom broj: 01-05-26-030-1-II/07 od dana 04.10.2007. godine.

Podnosilac Prijave je istu dopunio dana 11.10.2007. godine pod brojem: 01-05-26-030-2-II/07, dana 30.10.2007. godine pod brojem: 01-05-26-030-3-II/07 i dana 04.11.2007. godine pod brojem: 01-05-26-030-5-II/07. Prijemom tražene dokumentacije Konkurencijsko vijeće je utvrdilo da je Prijava kompletna i izdalo Potvrdu o prijemu kompletne i uredne Prijave, dana 04.12.2007. godine, pod brojem: 01-05-26-030-6-II/07, u skladu sa članom 30. stav 3) Zakona.

Podnosilac Prijave je naveo u Prijavi da istu nije podnio ni jednom drugom tijelu ovlaštenom za ocjenu koncentracije, izvan teritorije Bosne i Hercegovine.

U postupku ocjene Prijave utvrđene su sljedeće činjenice:

Podnosilac Prijave je podnio predmetnu Prijava u vremenskom roku od 8 (osam) dana od dana zaključivanja ugovora privrednih subjekata učesnika koncentracije, u smislu člana 16. stav (1) Zakona, te se ista smatra podnesenom u Zakonom utvrđenom vremenskom roku.

Ukupni godišnji prihodi privrednih subjekata učesnika predmetne koncentracije, po završnom računu u godini koja je prethodila predmetnoj koncentraciji, dana 31. decembra 2006. godine, iznose :

Tabela 1.

Ukupan prihod (KM)	Atlas Copco grupa	Atlas	AC Oprema
Svjetski prihod	(..)** ¹	(..)**	-
Bosna i Hercegovina	(..)**	-	(..)**

Na osnovu podataka o ukupnom ostvarenom prihodu učesnika predmetne koncentracije utvrđeno je postojanje obaveze prijave namjere koncentracije, obzirom da je ispunjen kriterijum ukupnog ostvarenog prihoda privrednih subjekata, učesnika predmetne koncentracije na tržištu roba i / ili usluga na svjetskom tržištu, u godini koja je prethodila predmetnoj koncentraciji, u skladu sa članom 14. stav (1) pod a) i b) Zakona.

1. Pravni osnov i oblik koncentracije

Pravni osnov predmetne koncentracije je Ugovor o prodaji udjela osnovnog kapitala (u daljem tekstu: Ugovor), zaključen dana 18. septembra 2007. godine, između privrednog subjekta Atlas (kao kupca) i fizičkog lica, Antona Doke (kao prodavca), koji je istovremeno osnivač i vlasnik 100,0% udjela u osnivačkom kapitalu privrednog subjekta AC Oprema. Predmetnim Ugovorom, privredni subjekt Atlas namjerava steći 100,0% udio u osnivačkom kapitalu privrednog subjekta AC Oprema.

Pravni oblik predmetne koncentracije je sticanje kontrole ili dominantnog uticaja jednog, privrednog subjekata nad drugim privrednim subjektom i to sticanjem kupovinom većine dionica ili udjela osnovnog kapitala, u skladu sa članom 12. stav (1) tačke b) pod 1) Zakona.

2. Učesnici koncentracije

Učesnici predmetne koncentracije su privredni subjekt Atlas Copco International B.V. Merwedeweg 7, 3336LG Zwijndrecht Holandija i privredni subjekt AC Oprema d.o.o., Safeta Zajke 266, 71000 Sarajevo, Bosna i Hercegovina.

2.1. Privredni subjekt Atlas Copco International B.V

Privredni subjekt Atlas Copco International B.V. Merwedeweg 7, 3336LG Zwijndrecht, Holandija, dioničko društvo, registrovan kod trgovačkog registra Privredne komore Rotterdam dana 29.06.1949. godine pod brojem: 23032900. Osnovna djelatnost privrednog subjekta Atlas Copco International je posjedovanje i finansiranje društava.

Privredni subjekt Atlas pripada Atlas Copco Group koja djeluje u velikom broju zemalja na distribuciji i prodaji opreme za rudarstvo, kompresora, industrijskog alata.

¹ (..)** - Podaci predstavljaju poslovnu tajnu

Privredni subjekt Atlas Copco Group djeluje na tržištu Bosne i Hercegovine preko privrednog subjekta Atlas Copco a.d., Republika Srbija, privrednog subjekta Atlas Copco d.d Republika Slovenija i privrednog subjekta Atlas Copco s.r.o., Republika Češka (svi su 100,0% vlasništvu privrednog subjekta Atlas Copco) te preko distributera privrednog subjekta AC Oprema.

Atlas Copco Group nema registrovana pravna lica na teritoriji Bosne i Hercegovine, niti posjeduje vlasničke udjele u drugim privrednim subjektima na teritoriji Bosne i Hercegovine.

2.2. Privredni subjekt AC Oprema

Privredni subjekt AC Oprema d.o.o., Safeta Zajke 266, 71000 Sarajevo Bosna i Hercegovina, registrovan je u sudskom registru Općinskog suda u Sarajevu dana 16.05.2006.godine, pod registarskim brojem: 1-25660.

Osnivač i vlasnik 100,0% udjela u osnovnom kapitalu privrednog subjekta AC Oprema je fizičko lice Anton Doko, (.)**, Zagreb, Republika Hrvatska.

Osnovna djelatnost privrednog subjekta AC Oprema je prodaja građevinske i opreme za industriju rudarstvo, te pružanje vezanih usluga.

Privredni subjekt AC Oprema vrši distribuciju i prodaju proizvoda iz asortimana privrednog subjekta Atlas Copco grupe na teritoriji Bosne i Hercegovine. Najznačajniji dobavljač privrednog subjekta AC Oprema (u 2006. godini) bio je privredni subjekt Scandkop d.o.o., Republika Hrvatska, koji je distributer proizvoda privrednog subjekta Atlas Copco Group u Republici Hrvatskoj.

Privredni subjekt AC Oprema ne posjeduje vlasničke udjele u drugim privrednim subjektima u Bosni i Hercegovini.

3. Analiza relevantnog tržišta

Članom 3. Zakona i čl. 4.,5. i 6. Odluke o utvrđivanju relevantnog tržišta ("Službeni glasnik BiH", broj 18/06) određeno je relevantno tržište određenih proizvoda ili usluga koje su predmet djelovanja privrednih subjekata na relevantnom geografskom tržištu.

Na osnovu podataka navedenih u Prijavi Konkurencijsko vijeće je utvrdilo, da je relevantno tržište proizvoda, učesnika predmetne koncentracije, prodaja opreme za industriju rudarstva.

Relevantno geografsko tržište za ovu koncentraciju je Bosna i Hercegovina, jer se prodaja proizvoda iz oblasti rudarstva vrši na cijeloj teritoriji Bosne i Hercegovine.

Slijedom navedenog, Konkurencijsko vijeće je kao relevantno tržište za predmetnu koncentraciju utvrdilo tržište prodaje opreme za industriju rudarstva na cijeloj teritoriji Bosne i Hercegovine.

Konkurencijsko vijeće pri određivanju relevantnog tržišta u Bosni i Hercegovini je uzelo u obzir da se djelatnosti privrednog subjekta Atlas Copco i privrednog subjekta AC Oprema preklapaju na tržištu prodaje opreme za industriju rudarstva.

Prema podacima iz Prijave tržišni udjeli učesnika koncentracije i konkurenata na relevantnom tržištu prodaje opreme za rudarstvo u Bosni i Hercegovini u 2006. godini iznose:

Tabela 2.

Rb	Kompanije	Vrijednost /Tržišni udio	
1.	Atlas Copco Group (Holandija)	1.641.999,60	45,00%
2.	Sandvik Tamrock (Finska)	1.094.666,40	30,00%
3.	Furukawa (Japan)	364.888,80	10,00%
4.	Montabert (Francuska)	182.444,40	5,00%
5.	Soosan (Koreja)	182.444,40	5,00%
6.	AC Oprema (Bosna i Hercegovina)	3.912,00	0,107%
7.	Ostali	178.430,62	4,89%
Ukupno (učesnici koncentracije 1+ 6)		1.645.911,60	45,107%
Ukupno		3.648.888,00	100,00%

Konkurencijsko vijeće analizom podataka (Tabela 2.) je utvrdilo, da privredni subjekt Atlas Copco Group na relevantnom tržištu prodaje opreme za industriju rudarstva, putem direktne prodaje, ostvaruje najveći tržišni udio od 45,00% na tržištu Bosne i Hercegovine, dok preko privrednog subjekta AC Oprema, kao svog distributera, ostvaruje tržišni udio od 0,107%, dok privredni subjekt Sandvik Tamrock (Finska) ima tržišni udio od 30,00% na relevantnom tržištu.

Tržišni udjeli učesnika koncentracije pokazuju da je relevantno tržište fragmentirano i da na istome postoji odgovarajuća tržišna konkurencija te da spadaju u srednje koncentrirana tržišta.

Nakon provođenja predmetne koncentracije na navedenom relevantnom tržištu, Atlas Copco grupa imaće tržišni udio od 45,107%, što znači da postoji pretpostavka stvaranja dominantnog položaja u skladu sa članom 9. Zakona, obzirom da ima veći udio u relevantnom tržištu od 40,00%. Slijedom navedenog, obzirom da privredni subjekt AC Oprema već djeluje na relevantnom tržištu u prodaji proizvoda Atlas Copco Group, kao njegov distributer, ovom koncentracijom neće doći do značajnijeg jačanja dominantnog položaja privrednog subjekta Atlas Copco Groupe na relevantnom tržištu Bosne i Hercegovine, jer privredni subjekt Atlas Copco Group kupuje distributera svojih proizvoda na tržištu Bosne i Hercegovine.

Privredni subjekt Atlas Copco Group, pored relevantnog proizvoda, u Bosni i Hercegovini prodaje i:

Tabela 3.

Proizvodi	Ukupna prodaja u BiH	Atlas Copco	
		Prodaja	Tržišni udio
Kompresori	2.000.000,00 KM	400.000,00 KM	20,00%
Industrijski alati	133.333,00 KM	40.000,00 KM	30,00%

Na tržištu prodaje kompresora i industrijskog alata, u Bosni i Hercegovini pored privrednog subjekta Atlas Copco Group koji ima oko 20,00% tržišnog udjela, djeluju i privredni subjekt Compare - Velika Britanija (tržišni udio 25,00%), privredni subjekt Kaeser – Kanada (tržišni udio 25,00%) veći broj manjih privrednih subjekta čiji tržišni udjeli iznose ukupno 30,00%

4. Procjena predmetne koncentracije

Konkurencijsko vijeće analizom podataka je ocijenilo da provođenjem namjeravane koncentracije neće doći do značajnije promjene tržišnih udjela na relevantnom tržištu u Bosni i Hercegovini.

Analizom podataka Konkurencijsko vijeće je utvrdilo da postoji značajna konkurencija na relevantnom tržištu što je pretpostavka djelovanje slobodne konkurencije, te nepostojanje zakonskih i administrativnih barijera za ulazak potencijalnih konkurenata na relevantno tržište.

Također, predmetna koncentracija treba imati pozitivne efekte na relevantnom tržištu Bosne i Hercegovine, u smislu smanjenja cijena relevantnog proizvoda (eliminisanja plaćanja troškova distribucije, povećanja kvaliteta proizvoda putem direktne isporuka proizvoda i vršenja usluga, unošenja inovacija, proširenja i povećanja obima proizvoda i usluga za klijente) te poboljšanje distribucije i servisnih usluga krajnjim potrošačima.

Cijeneći sve iznesene činjenice i podake, procjene u smislu člana 17. Zakona, Konkurencijsko vijeće je utvrdilo da predmetna koncentracija ne spriječava, ograničava niti narušava tržišnu konkurenciju u Bosni i Hercegovini te je odlučilo kao u dispozitivu ovog Rješenja - ocijenilo dopuštenom provođenje predmetne koncentracije u skladu sa članom 18. stav (2) tačka a) Zakona, i shodno tome odlučilo kao u dispozitivu ovog Rješenja.

5. Administrativna taksa

Na ovo Rješenje Podnosilac prijave u skladu sa Odlukom o administrativnim taksama u vezi sa procesnim radnjama pred Konkurencijskim vijećem ("Službeni glasnik BiH", broj 30/06) i u skladu sa članom 2. Tarifni broj 107 stav (1) tačka d) pod 1) obavezan je platiti administrativnu taksu u iznosu od 2.500,00 KM u korist Budžeta institucija Bosne i Hercegovine.

6. Pouka o pravnom lijeku

Protiv ovog Rješenja nije dozvoljena žalba. Nezadovoljna stranka može pokrenuti upravni spor pred Sudom Bosne i Hercegovine u roku od 30 dana od dana prijema ovog Rješenja, odnosno od dana njegovog objavljivanja.

Predsjednik

Sanja Božić